

UNIVERSITI SAINS ISLAM MALAYSIA

جامعة العلوم الإسلامية الماليزية  
ISLAMIC SCIENCE UNIVERSITY OF MALAYSIA

TIMBALAN NAIB CANSOLOR  
(HAL EHWAL PELAJAR DAN ALUMNI)

DEPUTY VICE CHANCELLOR  
(STUDENT AFFAIRS AND ALUMNI)

Pusat Hal Ehwal Pelajar  
Tel.: 06-798 6100/6101

Ruj. Kami: USIM.700-9/1/2 ( 12 ) (S)  
Tarikh : 28 Rejab 1446/ 28 Januari 2025

## SENARAI EDARAN SEBAGAIMANA LAMPIRAN 1

*Assalamualaikum Warahmatullahi Wabarakatuh*

YBrs. Prof./Prof. Madya/Dr./Tuan/Puan,

### PERATURAN-PERATURAN UNIVERSITI SAINS ISLAM MALAYSIA (PELAKSANAAN HUKUMAN KHIDMAT MASYARAKAT) 2024

Dengan segala hormatnya, perkara di atas dirujuk.

2. Dimaklumkan bahawa Mesyuarat Lembaga Pengarah USIM Bil. 6/2024 pada 19 Disember 2024 telah bersetuju meluluskan Peraturan-peraturan Universiti Sains Islam Malaysia (Pelaksanaan Hukuman Khidmat Masyarakat) 2024 berkuat kuasa mulai **1 November 2024**.

... 3. Sehubungan dengan itu, bersama-sama ini disertakan Peraturan-peraturan Universiti Sains Islam Malaysia (Pelaksanaan Hukuman Khidmat Masyarakat) 2024 sebagai makluman dan perhatian YBrs. Prof./Prof. Madya/Dr./Tuan/Puan dan seterusnya untuk dipanjangkan kepada kakitangan dan Penasihat Badan Pelajar di bawah seliaan masing-masing yang berkaitan. Peraturan tersebut juga boleh dimuat turun melalui laman sesawang Pusat Hal Ehwal Pelajar.

4. Sebarang maklumat lanjut berkaitan perkara ini boleh rujuk kepada Puan Amira Asyikin Razali, Ketua Seksyen Penajaan, Kebajikan dan Tata tertib, Pusat Hal Ehwal Pelajar di talian 06-798 6151 atau melalui emel [mirasyikin@usim.edu.my](mailto:mirasyikin@usim.edu.my).

Segala kerjasama berhubung perkara ini amat dihargai dan diucapkan terima kasih.

Sekian.

**"MALAYSIA MADANI"**

Saya yang menjatuhkan amanah,


**(PROFESOR DATO' DR. ADNAN MOHAMED YUSOFF)**

Timbalan Naib Canselor (Hal Ehwal Pelajar dan Alumni)

- s.k.: i. Ketua Pustakawan  
ii. Penasihat Undang-Undang

Berilmu, Berdisiplin dan Bertakwa

Knowledgeable, Disciplined and Devout



Universiti Sains Islam Malaysia, Bandar Baru Nilai, 71800 Nilai  
Negeri Sembilan Darul Khusus, Malaysia  
Tel: (+6)06 - 798 8017 | Faks : (+6)06-799 1309 | [www.usim.edu.my](http://www.usim.edu.my)

**PERATURAN-PERATURAN UNIVERSITI SAINS ISLAM MALAYSIA  
(PELAKSANAAN HUKUMAN KHIDMAT MASYARAKAT) 2024**

**KAEDAH 58, KAEDAH-KAEDAH UNIVERSITI DAN KOLEJ UNIVERSITI  
(UNIVERSITI SAINS ISLAM MALAYSIA) (TATATERTIB PELAJAR) 2024**

PADA menjalankan kuasa-kuasa yang diberikan di bawah Seksyen 4(1)(f), Perlembagaan Universiti Sains Islam Malaysia dan dengan kuasa yang diberikan di bawah Kaedah 58, Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024, maka Lembaga Pengarah Universiti membuat Peraturan-Peraturan seperti berikut:

**Nama dan permulaan kuat kuasa**

1. (1) Peraturan-peraturan ini bolehlah dinamakan sebagai Peraturan-Peraturan Universiti Sains Islam Malaysia (Pelaksanaan Hukuman Khidmat Masyarakat) 2024.

(2) Peraturan-peraturan ini disifatkan sebagai mula berkuat kuasa pada tarikh yang diluluskan oleh Lembaga Pengarah Universiti.

**Tujuan**

2. Tujuan Peraturan-Peraturan ini disediakan adalah untuk–

(a) menjadi peraturan kepada Universiti Sains Islam Malaysia bagi melaksanakan hukuman tatatertib berbentuk khidmat masyarakat kepada pelajar yang disabitkan dengan kesalahan tatatertib dan diputuskan bersalah oleh Jawatankuasa Tatatertib Pelajar, sama ada tatatertib am atau tatatertib akademik, dan dihukum di bawah Kaedah 58(1)(b) iaitu Hukuman Khidmat Masyarakat; dan

(b) sebagai salah satu alternatif hukuman berbentuk pendidikan dan pengajaran yang boleh diputuskan oleh Jawatankuasa Tatatertib Pelajar Universiti Sains Islam Malaysia.

**Tafsiran**

3. Dalam Peraturan-peraturan ini, melainkan jika konteksnya menghendaki makna yang lain–

“Jawatankuasa Tatatertib Pelajar” ertinya sebuah jawatankuasa yang telah ditubuhkan oleh Lembaga Pengarah Universiti Sains Islam Malaysia menurut Seksyen 16B(1) Akta Universiti dan Kolej Universiti 1971;

“khidmat masyarakat” bermaksud khidmat komuniti yang dijalankan oleh pelajar yang dihukum sebagai hukuman berbentuk pendidikan dan pengajaran kepada pelajar yang dihukum tersebut;

“pelajar yang dihukum” ertinya pelajar yang didapati bersalah dan dijatuhkan hukuman oleh Jawatankuasa Tatatertib Pelajar Universiti Sains Islam Malaysia.

#### **Pemakaian**

4. Peraturan-peraturan ini adalah terpakai kepada–

- (a) Pengerusi dan ahli Jawatankuasa Tatatertib Pelajar dalam membuat pertimbangan kes terhadap pelajar yang dihukum dengan kesalahan tatatertib dan mempunyai kuasa memutuskan hukuman menurut Kaedah 58, Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024; dan
- (b) Semua pelajar yang telah dihukum ke atas kesalahan tatatertib am atau akademik menurut Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024 dan didapati bersalah oleh Jawatankuasa Tatatertib Pelajar Universiti Sains Islam Malaysia.

#### **Pertimbangan**

5. Faktor dan pertimbangan yang boleh diambil kira oleh Jawatankuasa Tatatertib Pelajar dalam menentukan tempoh Hukuman Khidmat Masyarakat yang perlu dijalani oleh pelajar yang didapati bersalah atas kesalahan tatatertib yang dilakukannya:

- (a) Fakta kes;
- (b) Jenis kesalahan;
- (c) Latar belakang pelajar;
- (d) Mitigasi pelajar; dan
- (e) Apa-apa faktor lain yang difikirkan wajar dan patut untuk Jawatankuasa Tatatertib Pelajar pertimbangkan.

#### **Tempat Menjalani Hukuman**

6. Tempat Menjalani Hukuman Khidmat Masyarakat boleh di mana-mana premis berikut:

- (a) Asrama;
- (b) Fakulti, Sekolah, Akademi atau Institut;

- (c) Pusat Islam;
- (d) Perpustakaan;
- (e) Makmal;
- (f) Pusat Sukan;
- (g) Mana-mana bahagian lain di dalam Kampus; atau
- (h) Mana-mana tempat lain di luar Kampus.

### **Bentuk Hukuman**

7. Bentuk hukuman Khidmat Masyarakat boleh terdiri daripada mana-mana satu atau lebih pilihan berikut:

- (a) Mengemas dan membersihkan;
- (b) Menyusun buku;
- (c) Memasukkan data;
- (d) Menghantar surat;
- (e) Mengemaskini notis Kampus, Asrama, Fakulti, Sekolah, Pusat, Akademi atau Institut;
- (f) Bertugas di kaunter;
- (g) Membimbing pelajar lain;
- (h) Membantu pensyarah Dekan Fakulti, Ketua Sekolah atau Pengarah Pusat, Akademi atau Institut;
- (i) Melibatkan diri dalam program sukarelawan yang dianjurkan oleh Universiti sama ada di dalam atau di luar Kampus; dan/atau
- (j) Lain-lain aktiviti khidmat masyarakat yang difikirkan sesuai oleh Jawatankuasa Tatatertib Pelajar.

### **Pelaksanaan Hukuman**

8. Berdasarkan Kaedah 58, Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024, Jawatankuasa Tatatertib Pelajar boleh–

- (a) memutuskan supaya mana-mana pelajar yang dihukum dijatuhkan hukuman khidmat masyarakat sahaja; atau
- (b) menggabungkan dengan mana-mana bentuk hukuman yang disenaraikan dalam Kaedah 58, Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024.

### **Tarikh Mula Dan Tempoh Jam Hukuman**

9. (1) Jawatankuasa Tatatertib Pelajar hendaklah memutuskan tempoh jam hukuman khidmat masyarakat sama ada: -

- (a) 8 jam; atau
- (b) 12 jam; atau
- (c) 18 jam; atau
- (d) 24 jam.

(2) Tempoh masa menjalani hukuman khidmat masyarakat boleh dijalankan secara berterusan atau berselang sehinggalah mencukupi tempoh jam hukuman yang diputuskan oleh Jawatankuasa Tatatertib Pelajar.

(3) Tarikh mula hukuman khidmat masyarakat dijalankan hendaklah bermula mengikut tarikh yang ditetapkan oleh Jawatankuasa Tatatertib Pelajar.

(4) Semua hukuman khidmat masyarakat yang dijalani oleh pelajar yang dihukum hendaklah diselesaikan dalam tempoh satu (1) semester pengajian pelajar yang dihukum.

### **Keingkaran**

10. (1) Sekiranya didapati pelajar yang dihukum ingkar kepada mana-mana perintah hukuman khidmat masyarakat yang diputuskan oleh Jawatankuasa Tatatertib Pelajar, sama ada ingkar penuh atau separa, maka pelajar tersebut akan didenda sebagaimana peruntukan Kaedah 58(4), Kaedah-Kaedah Universiti dan Kolej Universiti (Universiti Sains Islam Malaysia) (Tatatertib Pelajar) 2024.

(2) Sekiranya pelajar ingkar membayar denda di bawah perenggan 10(1), pelajar tersebut hendaklah dengan segera digantung daripada menjadi pelajar Universiti dan tidak dibenarkan untuk berada di dalam atau memasuki Kampus dan penggantungan itu hendaklah berterusan sehingga keingkaran itu di dibetulkan.

### **Buku Log**

11. Satu buku log harian hukuman khidmat masyarakat yang dijalani oleh pelajar yang dihukum hendaklah disediakan dan diselia oleh Pejabat Hal Ehwal Pelajar Universiti dan hendaklah mengandungi butir-butir minimum seperti berikut:

- (a) Nama pelajar yang dihukum, jenis kesalahan, jenis hukuman tatatertib keseluruhan yang diputuskan oleh Jawatankuasa Tatatertib Pelajar;
- (b) Bentuk hukuman khidmat masyarakat yang perlu dijalankan dan tempoh masa keseluruhan hukuman khidmat masyarakat;
- (c) Tempoh jam harian hukuman yang dilaksanakan;
- (d) Butir-butir penyelia;
- (e) Tandatangan pelajar yang dihukum;
- (f) Tandatangan penyelia; dan
- (g) Lain-lain maklumat yang penting untuk dimasukkan dan dicatatkan.

#### **Kuat kuasa Peraturan-peraturan**

12. Peraturan-peraturan Universiti Sains Islam Malaysia (Pelaksanaan Hukuman Khidmat Masyarakat) 2024 hendaklah mula berkuat kuasa pada 1 November 2024.

#### **Pindaan**

13. Lembaga Pengarah Universiti boleh membuat sebarang pindaan, pemansuhan atau pembatalan bagi apa jua peruntukan yang terkandung dalam Peraturan-peraturan ini dari semasa ke semasa.

Dibuat [19 Disember 2024]

*TAN SRI DR NIK NORZRUL THANI BIN  
NIK HASSAN THANI  
Pengerusi  
Lembaga Pengarah  
Universiti Sains Islam Malaysia*